

- प्रधानमंत्री नरेन्द्र मोदी कह्यो—किसानां री आमदनी अर उपज बधावण माथे सरकार रो खास ध्यान।
- प्रदेश मांय वरिष्ठ नागरिक तीर्थ यात्रा योजना रा तैत ई दफा 40 धार्मिक ठोड़ां शामिल करीजी—56 हजार बुजुर्गां ने तीरथ यात्रा कराई जावेला।
- स्वच्छ सर्वेक्षण—2024 मांय पहली दफा प्रदेश रा सगळा शहरां री रैंकिंग मांय सुधार।
- चौमासा री बिरखा ऊं प्रदेश रा जल स्त्रोत करीब 64 फीसदी भर्या— आज छह जिलां मांय भारी बिरखा रो रेड अलर्ट।

000

प्रधानमंत्री नरेन्द्र मोदी कह्यो है के किसानां री आमदनी अर उपज बधावण माथे सरकार रो खास ध्यान है। श्री मोदी आज बिहार रा मोतीहारी मांय विकास री न्यारी—नयारी परियोजनावां री नींव रखण अर पूरा व्हा काम जनता ने संपण रे मौके बोल रह्या हा। वे कह्यो के पी.एम. किसान सम्मान निधि रा तैत हाल ताई आवास योजना ग्रामीण रो फायदो लेवण वाळां ने 160 करोड़ रुप्या ऊं बत्ती रकम आवंटित करी जा चुकी है। श्री मोदी कह्यो के नौजवानां ने नौकरी—धंधा मुहैया करावण ने बधावो देवण सारु सरकार एक लाख करोड़ रुप्या री योजना लायी है।

000

कृषि मंत्री डॉ. किरोडी लाल मीणा उपज अर किसानां री आमदनी बधावण सारु खेती—बाड़ी रा नुवा तरीका काम लेवण माथे जोर दीनो है। डॉ. मीणा आज जयपुर मांय महकमा रा अहलकारां अर न्यारी—न्यारी कम्पनियां रा नुमाइंदां सागे व्ही मीटिंग मांय बोल रह्या हा। कृषि मंत्री कह्यो के ए.आई काम ले र किसान बेहतर तरीका ऊं खेती कर सके है। वे कह्यो के इण ऊं फसल प्रबंधन, कीट—पतंगां अर साखां मांय बीमारियां री ठा करण अर मौसम ऊं जुड़ी जाणकारियां हासिल करण मांय मदद मिले है।

000

प्रदेश मांय वरिष्ठ नागरिक तीर्थ यात्रा योजना रा तैत ई दफा 56 हजार बुजुर्गां ने तीरथ करायो जावेला। 50 हजार बुजुर्गां ने वातानुकूलित रेलगाड़ी ऊं जदके छह हजार ने हवाई यात्रा कराई जावेला। देवस्थान मंत्री जोराराम कुमावत आज जयपुर मांय देवस्थान विभाग री वेबसाइट माथे ऑनलाइन तरीका ऊं अर्जी देवण रा काम री सरुआत कीनी। पात्र बुजुर्ग 10 अगस्त ताई अर्जी दे सके है।

श्री कुमावत बतायो के ऑनलाइन अर्जी मिल्यां पाछे जिला स्तर री समिति पात्र लोगां रो चयन करेला। तीरथ माथे जावण री मर्जी राखण वाळा जातरुआं री वैटिंग लिस्ट ई बणायी जावेला। ई दफा जातरुआं ने 40 ठोड़ां री तीर्थ यात्रा कराई जावेला। खबरनवीसां सागे बातचीत करता थकां श्री कुमावत कह्यो के देवस्थान विभाग रा तैत आवण वाळां मिन्दरां सागे ई सरकार दूजा मिन्दरां मांय ई प्रशासनिक अर कानूनी व्यवस्था बणायी राखण मांय मदद कर रही है।

000

राज्य मांय बाघां ने बचावण अर टाइगर रिजर्व्स री हिफाजत तैय करण सारु आज जयपुर मांय वन मंत्री संजय शर्मा री सदरत मांय राजस्थान बाघ संरक्षण फाउंडेशन री मीटिंग राख्यी ज्यी। इण मांय प्रदेश रा न्यारा—न्यारा टाइगर रिजर्व्स मांय बाघां री तादाद, निगरानी व्यवस्था अर तकनीकी साधनां रा बारा मांय चर्चा करीजी। ई दौरान वन मंत्री सी.सी.टी.वी., ड्रोन रे जरिये निगरानी अर ई—गश्त सिस्टम ने मजबूत करण रा हुकम दीना। वे अभ्यारण्यां मांय साफ—सफाई री उचित व्यवस्था सागे ही सैलानियां सारु सुबीता बधावण माथे जोर दीनो।

000

राज्य सरकार शिक्षा रा अधिकार रा तैत मौजूदा शैक्षिक सत्र सारु प्री— प्राइमरी शिक्षा रा नियमां मांय बदलाव कीनो है। ई पाछे अब राज्य री गैर—सरकारी स्कूलां मांय शिक्षा का अधिकार रा तैत मुफ्त दाखिला केवल यूकेजी 3 अर पहली कक्षा मांय ई दिया जावेला। माध्यमिक शिक्षा निदेशक सीताराम

जाट जिला शिक्षा अधिकारियों ने ई बाबत हुकम जारी कीना है। वे साफ कीनो के प्री-प्राईमरी लेवल री एल.के.जी. अर यूकेजी 2 मांय अब फीस पाछी देवण री मंजूरी नी दी जावेला।

000

प्रदेश मांय मुख्यमंत्री अनुप्रति कोचिंग योजना सारु पोर्टल बेगो ई खोल्यो जावेला। सामाजिक न्याय अर अधिकारिता विभाग रा निदेशक आशीष मोदी बतायो के योजना रा तैत मुफ्त कोचिंग री मर्जी राखण वाळा उम्मीदवारां ऊं ऑनलाइन तरीका ऊं अर्जियां मांगी जावेला। ई सारु उम्मीदवारां ने मैट्रिक अर बारहवीं कक्षा पास करण री मार्क्स लिस्टां डीजी लॉकर मांय राखणी व्हेला।

000

आवास अर शहरी कार्य मंत्रालय री ओर ऊं देश मांय साफ-सफाई रा मानकां रा आकलन अर इण ने बधावो देवण सारु हर साल स्वच्छ सर्वेक्षण करायो जावे है। स्वच्छ सर्वेक्षण 2024 री रैंकिंग मांय राजस्थान घणो सुधार कीनो है। स्वच्छ सर्वेक्षण 2024 मांय पहली दफा राजस्थान रा सगळा शहरां री रैंकिंग मांय लारला साल री तुलना मांय सुधार व्ह्यो है। खास बात आ रही के किण ई शहर री रैंकिंग मांय उतार नी आयो है। डूंगरपुर ने सुपर स्वच्छता लीग श्रेणी मांय नवाजी ज्यो, जदके जयपुर नगर निगम ग्रेटर ने प्रोमिसिंग स्वच्छ शहर सारु ईनाम दियो ज्यो। पहली दफा राज्य रा तीन स्थानीय निकायां उदयपुर नगर निगम, जयपुर ग्रेटर अर जयपुर हैरिटेज नगर निगम देश रा आला 20 साफ निकायां मांय शामिल व्हे र राज्य रो मान बधायो है। ई सागे ई प्रदेश रा 12 शहर अव्वल एक सौ साफ शहरां मांय नाम मंडायो है।

000

राज्यसभा रा सांसद अर भाजपा रा राष्ट्रीय प्रवक्ता डॉ. सुधांशु त्रिवेदी कह्यो है के भारत री आतंकवाद रे खिलाफ लड़ाई ने दुनियाभर रा देशां री हिमायत मिल रही है। श्री त्रिवेदी आज जयपुर मांय भाजपा रा प्रदेश मुख्यालय मांय खबरनवीसां सागे बातचीत कर रह्या हा। वे कह्यो के पहलगाम आतंकी हमला रा खास आरोपित आतंकी संगठन टी.आर.एफ. माथे अमेरिका ई रोक लगा दीनी है।

000

सूचना अर प्रसारण मंत्री अश्विनी वैष्णव आज मुंबई रा राष्ट्रीय फिल्म विकास निगम-एन.एफ.डी.सी. परिसर मांय भारतीय रचनात्मक प्रौद्योगिकी संस्थान-आई.आई.सी.टी. रो उद्घाटन कीनो। आई.आई.सी.टी. रा विकास सारु केंद्र सरकार चार सौ करोड़ रुपया आवंटित कीना है। ई मौके श्री वैष्णव रचनात्मक उद्योगां ने बधावो देवण रा सरकार रा नजरिया माथे चर्चा कीनी। वे कह्यो के आई.आई.सी.टी. नौजवानां सारु नुवा मौका मुहैया करावेला।

000

मौसम विभाग आज अजमेर, भीलवाड़ा, बूंदी, कोटा, टोंक अर पाली मांय भारी बारिश रो रेड अलर्ट जारी कीनो है। ई सागे ई नौ जिलां मांय तेज बरसात रो ऑरेंज अलर्ट जद के कुछ जिलां मांय बिरखा रो येलो अलर्ट जारी करी ज्यो है। ई बीच, आज लगातार बारिश व्हेवण ऊं केई ठोडां पाणी भर ग्यो है अर जिन्दगी माथे असर पड़्यो है। बांरा, कोटा, बाड़मेर, बालोतरा, जैसलमेर, धौलपुर, पाली अर करौली जिलां मांय तेज बारिश व्ही। प्रशासन री ओर ऊं लोगां ने नदियां रा बहाव हलका ऊं दूर रेहवण री अपील करीजी है। राजसमंद मांय ई मूसलाधार पाणी बरस्यो। म्हाणा खबरनवीस बतायो के भारी बारिश ऊं कुंभलगढ़ मांय हालात बिगड़ गया है।

.....

लारला 24 घंटां मांय सब ऊं बत्ती करीब 16 सेंटीमीटर बारिश कोटा जिला रा सांगोद मांय व्ही। बारां, अजमेर, झालावाड़, बूंदी, करौली, सवाईमाधोपुर, हनुमानगढ़ अर नागौर मांय ई जोरदार मेह बरस्यो। चौमासा री चोखी बिरखा ऊं प्रदेश रा कूड़ा-बावड़ियां अर तळावां मांय ऊं करीब 64 फीसदी भर गया है। ई सागे ई छोटा-मोटा 693 बंधां मांय ऊं 115 लबालब भर गया है जदके 404 थोड़ा-घणा भर्या है।

000

जयपुर मांय आज सी.ए. स्टूडेंट्स टैलेंट सर्च ग्रैंड फिनाले री सरूआत व्ही। पहली दफा करीजी ई पहल रो उद्घाटन विधानसभा अध्यक्ष वासुदेव देवनानी कीनो। ई मौके वे कह्यो के चार्टर्ड अकाउंटेंट देश री माली व्यवस्था रो खास हिस्सो है। श्री देवनानी कह्यो के चार्टर्ड अकाउंटेंट्स ने राष्ट्र प्रथम री भावना ऊं काम करणो चाहिजे।

000